

張忠烈公集

冰槎集三目次

張忠烈公集卷三

論

子房報韓論

李陵論

碑記

山頭重建海塘碑記

檄

海師恢復鎮江一路檄
代延平王

祭文

祭海神文
代魯王

祭山神文

祭建國公鄭羽長

鴻達文

祭平西侯張九苞

自盛文

祭定西侯張侯服

名振文

祭四叔父文

祭延平王文

祭監國魯王表文

雜著

自用硯銘

楹聯

冰槎集三目次

冰槎集三

張忠烈公集卷三

皇朝賜諡忠烈明贊理收勦機務察視浙直水陸兵馬兼理糧餉兵部尚書兼東閣大學士鄭燧言撰

論

子房報韓論

自古稱張良始終為韓先儒論之詳矣今世之事偽廷者多借此以為口實以建夷固嘗驅賊遂以沛公亡秦子房事漢為擬噫何其不倫之甚也夫子房在韓未嘗通籍而仕也特以五世相韓散金結客於時六國已無餘燼矣博浪一椎不過舒其憤鬱無聊之氣豈謂其必能碎祖龍之車哉藉令偶中而扶蘇尚在蒙恬輩皆宿將咸陽之火固未可覲覲也迨副車誤擊下邳潛遊子

房之智勇亦幾交困然而鑄池壁返羣雄並起而亡秦
子房更出而將兵掠地與沛公遇于留以兵屬焉韓尚
未有王也迨沛公至薛與項梁共立楚懷王子房求得
韓諸公子而曰橫陽君成賢說梁立之子房遂以韓司
徒徇韓地其從漢入關懷王命也夫亡韓者秦也亡秦
者楚與漢也子房仇秦則欲亡秦欲亡秦則必德亡秦
者若是乎子房德楚則宜事楚德漢則宜事漢何必韓
公子又何必韓司徒乎且韓王成不過諸公子非真當
立者而子房卒相之欲偕之國嗟乎斯其所以為報韓
也及羽留韓王於彭城弗遣而韓司徒不得不徘徊於
漢以觀其變觀史載漢王歸國子房送之南鄭辭歸勸

以燒絕棧道此時雖為畫策尚未委質於漢也未幾楚
竟廢殺韓王子房間行歸漢于是_不以仇秦者仇楚既
仇楚不得不惜漢以滅楚楚既滅而韓竟無後然子房
終不欲用於漢乃擇留以自謝辟穀以自詭焉然則楚
不留韓王子房固不為楚用楚不殺韓王子房亦安肯
為漢用耶或者曰子房嘗阻漢立六國後矣為韓者固
如是乎抑知漢王還定三秦已無公子成矣襄王孫信
又齷齪不足輔使酈生計行而漢益弱漢弱而楚終不
得滅楚不得滅而韓仇終不可報子房之于漢蓋有大
不得已于其間者焉至于我明則大異于是當閹賊之
犯闕也烈皇帝身殉社稷所陷沒者不過秦晉燕趙耳

非若三韓之盡折入于秦也有子房者在必倡大義于天下較沙中椎擊之功相萬萬也況天潢之在東南者何止一公子成金陵擁立以至閩越推戴中華正統方與日月為昭彼中原士大夫者即不為太真歸闕而四皓可扳即不為仲連蹈澗而兩生可趾獨奈何甘以衣冠之族為左袵驅策哉夫建酋固我屬夷也一舉而踞北都再舉而竊南紀共主蒙塵宗藩化碧而亂臣賊子顧曰彼沛公也亡秦者也我子房也報韓者也則是閩賊得比秦始皇而沛公實殺韓公子也則是子房當事楚霸王而建商可稱漢高帝也嗚呼誣子房矣

李陵論

世以李陵報蘇子卿書出自史遷之筆蓋遷欲掩其保
舉之失而所云欲得一當以報漢者陵則無有也余謂
不然今觀其河梁諸什未始不歎風波之失所而劉瀉
感慨無一慙漢之詞是豈亦遷所偽製耶即就陵當日
之事而論之方陵之出塞也初非疆場不靖而亭障失
守也武帝特欲示威于四夷故窮躋其兵千里而趨利
陵不過一偏裨提不滿五千步卒深入沙漠殺傷相當
而又鮮攸飛貳師為之後勁其勢固已危矣迨矢盡力
竭而後降志亦大可哀也夫陵之罪在不能死耳與棄
師辱國者稍有間與事仇噬主者更有間矣而漢連坐
之不少貸則安望陵之能為朱序哉設令漢武聞陵之

敗臨軒而歎側席而思為之恤其母撫其孥或誤傳陵
已死事更為招魂以祭卹典以贈之陵雖犬豕當必悔
恨自裁矣敢忘漢恩德哉夫何功罪之不明陵卒以族
母怪乎論者謂漢少恩也倘陵而心懷逆節氣結重誅
或教匈奴以犯邊或引華人以助虐不特子卿故節難
留雪窖而匈奴十萬控弦直可長驅中土豈僅僅烽達
甘泉而已哉然陵于子卿之歸國纏綿反覆贈之以詩
而曰陵之罪上通于天其亦可哀也已夫陵當漢盛時
起偏裨提孤軍出遠塞戰敗而降漢若九牛亡一毛其
族屬輒蒙顯戮當世士大夫無一言為之辨解惟司馬
遷稍稍言之乃以為為陵游說遂下蠶室此足見國憲

之有常而軍律之不可違也假使陵荷節鉞之重會匈奴鳩張王關淪陷漢家瑋境內甲兵以託陵不幸而被圍遂倒戈解甲屈膝偽庭則其罪居何等也又使陵受賜卹之殊恩冒祭饗之異數而乘潢池弄兵反戈相向覆漢之宗社毀漢之衣冠甚至率犬羊以芟薙漢之子孫黎民則其罪更居何等也由是觀之陵之罪不當未減而平反之也哉雖然刑者銅也一成而不變故君子用心焉春秋之義美召陵城濮者深內夏外夷之防也怒仲遂季友者甚亂臣賊子之事也明乎此則知我之所以論李陵矣

碑記

山頭重建海塘碑記

台之巖城枕山負海其東鄙即尾閭也其鄉名長亭吞
吐潮汐民居日與魚鼈為鄰而地脈湧出贅附一沙與
龍山相峙對地號山頭實沮洳場也後以馮袁二姓來
卜築於此為澮以豬山泉為塘以捍海潮而其族始盛
其俗樹藝之外皆魚鹽為業久之亦遂殷阜當我國家
盛時海波不揚邑多賢長吏而濱海凡封又鮮戎馬騷
騷故上農亦已力田舉科彙戶亦各以網罟牢盆著姓
氏且家禮樂而戶詩書或冠進賢或補博士弟子員蓋
彬彬乎盛哉但海介山海間田阻山則多磽恆苦曠田
阻海則多鹽恆苦潮于是鄉之人聚族而謀伐木畚土

隆其地複其障微但滄海變為桑田即瀉酒胥化為膏
腴矣迨國變頻仍鱗介易我冠裳十餘年來義旌徧海
外戎服繁興海濱遺黎朝秦暮楚供億竭于兩國民力
用是益殫而保據茲邑者文則猴冠武則虎翼民尚家
室不保遑問封表哉由是沈潦內潰洪濤外嚙向之膏
腴者仍歸瀉酒矣桑田亦幾變為滄海矣余自乙酉倡
義漂泊海曲有年近復鞠旅於猴城外島聞之悵然曰
國事滄桑矣而民事豈可緩乎且山頭地勢污下一遇
洪濤噴薄無論阡陌巨浸即廬舍亦蕩漾波濤中倘不
急為修繕民為魚鼈乎迺出金五十為倡鳩工伊始而
義士馮某等為醵金錢聚土木以虔其事大抵富者輸

財貧者輸力靡不奔走恐後因就其故址增以新防凡
卑者崇之圯者累之闕者修之薄者豐之自冬徂春蓋
三閱月而工始竣猶慮人情之易偷也申以今時捐財
之多寡為他日受田之廣狹焉亦可謂計及久遠者矣
義士馮某等以功由余始思勒諸石且徵文於余余曰
天下事變孰有甚於滄桑者乎今乾坤陸沈余不能塵
滄海而挽皇輿而獨能使一方桑田不波乎凡爾之得
以踐土食毛者父老子弟之力耳余何知遂詮次顛末
以應其請若夫董其役者則有參軍某執金吾某例得
並著

檄

海師恢復鎮江一路檄代延平王

昔五胡亂夏僅一再傳而滅今東虜應誠適二八秋之期誠哉天道好還況也人心思漢慨自李賊倡叛神京陸沈建酋本我屬夷屢生反側遂乘多難竊踞中原衣冠變為犬羊江山淪于戎狄凡有血氣者未有不痛心切齒于奴酋者也本藩奉天倡義伐罪弔民臥薪嘗膽法古用兵生聚教訓已踰十年正朔難偏僅存一錢茲者親統大帥首取金陵出生民于水火復漢官之威儀爾偽署文武將吏皆係大明赤子誰非中國紳衿時窮勢屈委質虜廷察其本懷甯無隱忍天經地義華夷之辨甚明本本水源忠孝之良自在至如遼人受我明三

百年之秦養遭逆虜三十載之摧殘祖父既受其刑毒
母妻甚被其宣淫亦二三孤兒尚為旗下之奴百千弱
女竟作胡中之婦報仇雪恥豈待異時歸正反邪端在
今日則張良報韓先揮博浪之椎朱序歸晉遂成淮淝
之捷或先機革面或臨敵改圖以全省全部來歸者不
吝分茅裂土以一邑一鎮來歸者定與度地紀勛或率
兵而至論其衆寡而照數授職或潔身而來則就其職
掌而量材超擢若蒙古女真世受國家撫賞之恩原非
一類其在天地覆載之內亦有同仇無懷二心視之一
體不但休屠歸漢名高日碑且如同紇扶唐烈光葉護
矣本藩仁義素著賞罰又明先機者有下次之賞後至

者有不測之誅一身禍福介在毫芒千古勛名爭之頃
刻師不再舉時不再來布告遐邇咸使聞知敬哉特諭
永祿十三年七月二十日給

祭文

祭海神文代魯王

余乃大明高皇帝之九世孫也自高皇帝驅逐胡元奠
甯方夏懷柔百神凡江河川瀆之神無不崇祀而神于
水中最尊且大春秋命所在有司致祭惟謹蓋三百年
于茲矣神豈忘之耶近者醜虜肆行憑踞都邑未知其
曾祭如故典否若陳牲列俎而羅拜于下者皆髡髮左
衽之人知神之必憤然而起吐不享余起義于浙東與

薪膽者七載而兩載泊于此風不揚波而能潤土珍錯
品物畢出給鮮又知神之不忘明德余實受其福也今
義旅如林中原響應且當率文武將吏誓師揚帆共圖
大事潔誠備物致告行期啟行之後日月朗曜星辰爛
陳風雨靡薄水波不驚黃龍蜿蜒紫氣氤氳權楫協力
左右同心功成事定崇封表靈是神且食我大明之馨
香于萬世也今日為伊始哉其顯承之

祭山神文

竊聞盛德在御而四靈可畜至誠所格則百獸皆馴余
自倡義以來思挈山河而還帝室揭日月而返重光神
之聽之亦既有年迨從閩嶠回師駐節茲土神所憑依

將是在是矣乃疇昔之夜忽有猛獸傷我畜牧是胡乎來
哉昔者空山寂寥猙獰之輩張牙露爪得借此以為遁
逃藪余今爰舍于此計當滅跡潛蹤矣而猶然不戢是
亡等也聞毛蟲之長制命山靈神職在彈壓而使若輩
暮夜縱橫將典守之謂何或以余老在島上未及薦馨
聊遣山君以儆匱祀則神亦饔饔者流又何正直之足
云夫五嶽視三公等而下之封內名山宜各有分限余
奉天子之命開府東南論階辨秩山神應受節制用是
遣官傳飭神其速顯威靈非我族類即遣之境外或其
惡貫滿盈不妨自斃山中倘挾彼負隅之技仍肆伏莽
之奸余當焚其林掃其穴惡獸斯盡神亦震驚令在必

行神其母忽

祭建國公鄭羽長鴻遠文

嗚呼我兄飛熊上將汗馬元功樓船解外鉦鼓江中屏藩帝室帶礪侯封會逢喪亂益懋勤庸謀雲猛雨擊水搏風西江射虎南服從龍登壇受鉞錫鬯銘鐘豈繫心膂允矣股肱制事既墜閩疆旋覆再展霓旌重扶日轂不惜破家以襄監國九伯咸征六師是督功在衣冠威行牙纛偽吏角崩羣酋面縛底績扶桑揚聲簡竹爰拜泥金遂膺潢玉憶昔在藩同盟連翩珠盤玉敦實惟九賢定西昆李肅虜姻連安福差長相國比肩中丞司禮雁行周旋媿余下乘亦競先鞭或沒王事或終天年惟

兄與余靈光巋然兄既解兵余尚誓旅泐泐參辰盈盈
帶水千里片鴻經年尺鯉北顧旌旗南詢杖履奏凱相
期加餐足喜懸擬壯猷東山復起夫何計聞遽騎箕尾
感切同仇痛深後死嗚呼哀哉山陽哀逝士衡辨亡交
此百憂云胡弗傷兄所未暝野馬黃羊余所為慟封豕
天狼庶憑威爽默贊一匡些詞不文聊以薦觴鷺江滾
滾鷺島蒼蒼忠貞義烈山高水長

祭平西侯張九苞自盛文

嗚呼天荒地老達人每等視於霓光琴亡劍化哲士或
寄懷於星芒然而苑枯者旦暮修短者陰陽委形順命
夫何用其悲涼獨廢興存亡之感交切于中而不能自

解者其在公之喪蓋公之勛名如橫海下漱則英威不可謂不彰公之壽考幾營平新息則景福不可謂不康公之裔嗣如瓊林玉樹則承家不可謂不昌公之部曲皆鐵膽石腸則報國不可謂不莊惟是鯨鯢雖靖而中原之虎豹尚狂帶礪雖盟而中興之旄鉞誰張奚不慙遺元老以九合而一匡而遽騎箕尾而上翔此則慰公者高爵希齡全名完節而所以惜公者未及搏風細柳捧日扶桑即公之當自惜而不能自慰者猶有遜於銅柱之平蠻金城之平羌鹿鹿如余烈公之盟壇亦謬稱雁行冀公之義旗亦庶幾鷹揚忽聞舟壑之移不禁悽惻而涕滂愧行營之旣阻弗克執紼以趨踰敬遣一介

陳詞而告奠兮聊寫予之悲傷倘炎輪之非遠兮尚不
格乎椒漿

祭定西侯張侯服名振文

嗚呼我兄墓草已宿矣墓木已拱矣回念乙未之冬棄
捐賓客距今僅七載耳其間廢興存亡之感月異而歲
不同如我兄既歸三尺土而不能保百年墳致有發冢
開棺之變余聞之痛何可言哉幸我師入定毀逆民之
廬屠逆民之族陰魂其亦可少慰獨余以飄零患難之
身入閩入吳浮海浮江數年內屢蹶屢奮徒深挂劍之
懷每阻吳雞之願空山寂寥知兄當慨然而悲矣茲憑
仗靈爽駐師林門苦以軍滯未遑瞻掃高壑特備椒漿

遣員代侑嗚呼蒲州孤島今存荒壤丁鶴歸來徒有華表耳能不痛哉

祭四叔父文

嗚呼叔父其死獄中矣其得疾而殞耶抑感憤引決耶
姪自丁國難倡義辭家迄今十有七載吾父見背路隔
華夷奔喪無所至今抱恨終天嗣是門衰祚薄猶幸叔
父支持歲時伏臘祖宗血食不絕如綫今則已矣春仲
姪提師北還始知叔父于正月下浣被賊拘繫業赴省
獄矣姪聞之痛心疾首計叔父衰老南冠泥首形影龍
鍾其能久乎未幾而計音果聞矣吾弟昌言以虜網四
張幸而得脫潛鱗戢羽將母蘆中既不能橐糧相救亦

不能含斂躬親故叔父易箚之期竟不可聞而訃音亦得之友朋之書及六月三日弟來知叔父以四月十三日捐館始敢為位而哭叔父年已逾耄因姪抗節遂以瘞死是叔父因姪而亡姪甯不痛心乎古來教子弟者動以忠義為訓豈意忠義可為而不可為耶自古何代無廢與其間必有忠臣義士伏節抗旌思匡扶王室因以傾家者往往有之若尊行受禍亦不少概見今逆虜棄天經數人葬株連波累致叔父畢命園扉姪獨何心能不肝腸寸裂耶姪自倡義以來屢奮屢蹶幾于啗雪吞氈卧薪嘗膽招之不應購之不克始逮及妻孥故新婦與祺兒錮獄已經十載姪義不返顧自分為劉琨為

下壺矣何期復貽禍叔父耶前此叔父之得免者虜視
姪無甚重輕也及己亥姪入長江連下名城數十虜遂
恨姪畏姪且忌姪而誅求不遺餘力卽我婦與姪夫及
二三故交亦在不免而況叔父乎嗚呼痛哉叔父雁行
有四人吾父居長止生姪一人二叔早亡無嗣三叔以
考終生從兄弟三人長嘉言次昌言又次德言叔父無
所出昌言遂為承祧然初無家人產今叔父既逝姪與
嘉言皆在軍次歸里無期德言尚穉弱恐不任箕裘則
高曾之不祀忽諸是姪未能報國先已亡家矣嗚呼痛
哉近者聞共主蒙塵而姪且重違家難天道其果有知
耶其果無知耶豈春秋大義徒虛語耶姪不能為復楚

申胥必頻為奔鬲臣靡矣但既無秦庭可哭又鮮有鬲
可奔恐終當為伏柱豫讓耳嗚呼歸櫬何時拊棺莫望
徒有泣血而已嗚呼痛哉

祭延平王文

維王金符啓曜玉牒分光勛追武肅忠貫汾陽昔在草
昧翊我隆皇寵承西第謨展東廂山河茅社日月旂常
將壇專制甥館齊行赤靈幾斷丹腑彌彰難回駿馭益
厲鷹揚玄圭錫命黃鉞開疆霓霓鐵騎錦纓牙樯聲馳
沈木威壓扶桑貫胸貢臚制腹增璜始開朱垺仍聽碧
幢壘思幹父謀為讓王迺戒鞞路爰整旂旌肅將九伐
勤宣一匡醜夷面縛賊虜死僵陵遲展謁城高受降中

原冠帶夾道壺漿悲殆復動鳴鏑猶強盟津雨洗閭島
雲翔再揮水犀以射天狼溫禺鬻鼓屠耆染戕肇基東
鄙拓地南荒乾坤猶開夷夏咸康伋班師旅終仗尊據
夫何月掩忽而星亡九關翼折百谷濶狂吹臺寂寞疑
塚淒涼樹還靡漢系尚存唐豈無雙鳥載彼歸航應有
三矢捧茲遺囊繫維善繼厥後克昌某乃焦桐囊下苦
李溪傍萬間庇厦十載依牆驚聞劍化痛切舟藏所愧
艷繫徒結中腸薤露在紙絮酒在觴非敢告奠聊志不
忘彷彿袞衣翩然帝鄉

祭監國魯王文

伏以龍逝橋陵璵璠結攀髯之痛麟遊闕里桐珪含解

跋之悲況欲執羈勒而無從祇覺筦領之莫逮魂消聞
嶠淚洒越臺欽惟我主上位膺乾四德備咸三青社雲
從蔚矣東藩佳氣赤城霞起巍然南紀靈光屬以國事
頻仍遂爾義師首舉栖秦望之甲盾豈僅虎賁三千建
梁孝之旌旂共仰龍飛九五而志梟逆虜故功高讓皇
月羽星鉞射江湖而立四極白旄黃鉞橫海嶠而總六
師迨剗閭之瘡痍尚圖收燼適滇黔之擁戴是用歸藩
風雨漂搖悲五蛇之失所波濤震撼悵六鷁之退飛雖
潛邱依斟酌薪彌厲而許田易鄭髀肉漸生方期再回
靈武之鑒誰意遽掩蒼梧之駕百音遏滅千里震驚臣
才愧鄙枚任同種蠱十九年之旄節屬國不殊廿四郡

之鼓旌平原無恙恨哭廷而未效嗟掃墓以何時投壁
還秦早慚狐偃扁舟去越敢學鳩夷徒臨扛鼎之懷愈
抱號弓之痛薇垣墜曜楓陞垂露梓王馭駿以來歸已
孤此願望帝化鵲而猶在莫慰餘思

雜著

自用硯銘

投鼠支牀幾經摩劫堅貞不渝何嫌破裂左我揮濡長
此昕夕

楹聯

虛懷揖當世英雄但願揭竿並起努力謝中原父老還
期捲土重來

冰槎集三

奇零草一目次

張忠烈公集卷四

四言古詩

春暮有懷

促織

泉穴魚

五言古詩

寄懷徐閣公 甲午

其二

妒婦津

孤桐吟

薤露吟

蒿里曲

歸思寓郡望姓氏丙申

述懷

其二

懷古

其二

代內人獄中有寄

擬答內子獄中之寄

吳佩遠游雁蕩歸備述各勝因為詩紀略亦志余

企望之懷也戊戌

苦饑

贈別陳文生還三山

虜廷以余倡義既久屢復名城遂逮及族屬且開
告密之門波累親朋榜掠備至聞之泣然

七言古詩

秦吉了

枯魚過河泣

泊馬蹄塞戲成

其二

壽張鯢淵相國

鴻門歌

賦贈琴師

楊芳生以徐聞公高弟浮海來晤于東甌爰贈一章

閩南行

苦雨吟

滄洲行

壬辰

舴艋行

寄紀石青

乙未

歲在戊戌余行年已三十九矣撫時感事遂以名

篇

戊戌

長鯨行

辛丑秋虜遷閩浙居民壬寅春余艤棹海濱春燕

來巢于舟有感而作 壬寅

奇零草一目次

奇零草一

張忠烈公文集卷四

皇朝賜諡忠烈明燦理波勦機務察視浙直水陸兵馬兼理糧餉兵部尚書兼東閣大學士鄧張煌言撰

四言古詩

春暮有懷

嗟予初衣柔翰勃窣國難驅人袵金袖鐵日月如駛跼
地踏天汎汎滄海盤桓少年薄暮酒歌愴焉彼美安得
九還以度靈紕山川窈窕爰奏素琴琴言雖何寫此素
心

促織

促織促織微吟閨夕緯婦驚秋停機太息織嫌苦疏織
續苦密萬縷千絲織不成匹

泉穴魚

南有鮒魚實生泉穴臣於龜君鼉行仰沫水族失歡暴
腮弗^活豈其櫻鱗貪餌故絕

五言古詩

寄懷徐闇公

甲午

蹇余信姱修始服違天步擾擾風塵馳念之徒心怖四
海選交游椒蘭漸非故會合總泥塗乖違隔衢路所貴
膽與肝在遠彌相附寒江已腹堅鴻雁莽南驚太息物
候遷含情託毫素

其二

黃鵠翔漢表厲氣何崢嶸朝食方壺實暮掇圓嶠英網

羅不得挂稻梁安所馨俯視滄溟流驕語鷗與鵬萬里
母乃隘千仞奚足驚豈意彌天置礙爾莫長征明時重
羽儀雲路距冥冥

姑婦津

姑婦死津頭津亦名姑婦少女相經過風雨不得渡或
為蓬垢顏竊恐逢彼怒古云粥倉庚可以療此癩惜哉
彼婦愚雖死猶弗悟

孤桐吟

孤桐產嶧陽百尺巢風雨時作白龍吟天然發宮羽斷
為爨下材遂與棗栗伍中郎秉斧鑒勿因積薪阻飾以
琬琰姿摩娑一再鼓清聲洞天地神物炫今古士誠貴

知音此道已如土

薤露吟

赤風蕩海宇弱水羣飛揚日月長麗天中有蓬萊鄉桓
桓國虎臣據圖畫封疆火生木必焚害金自相戕屏藩
遂已撤干戈及寢皇白日竄野馬黃昏繞國殤貴賤同
一骨誰為送北邙

蒿里曲

猛獸在深山藜藿亦壽考況也濟亂離疏干城國之寶一
朝捐賓客三軍哭孤島李代桃亦僵薊易絲逾擾吁嗟
周遺民去作流離鳥路達故鬼語死生何草草野死填
烏蒿水死蛟螭飽哀哉失所天人命不自保

歸思寓郡望姓氏丙申

兵甲破天來卽樊亦改氣中田一揮手十年悲捐棄四
晞髮扶桑津希踪渺無儼胡為歲寒心古今迥自異明
弦月挂霜空弔禽沒雲際悵悵嘆遠行人生竟安寄
交游漸已乖父書將終廢幼穉儼成行刀環徒縈繫
等身五嶽間寸土焉留滯睹物起離情目斷歸鴻易著

述懷

王室方板蕩萬里颺悲風南紀亦滔滔島嶼有羣雄羣
雄苦不成歲月坐冰融五侯並九伯化為蒿與蓬樓船
出閩越軍聲正及鋒金符剖異數玉牒綴強宗匪云優
晉錫所以厲康功孤臣懷共主髣髴五雲封九關踞虎

豹闔闔不得通迴槎天漢際躑躅倚王公顧念命卿微
一旅甘附庸蒙恥期匡濟敢言蹇匪躬但慮踪跡異復
慮踪跡同悠悠千載下誰復想孤忠

其二

弱齡尚遐異辟穀慕青鸞骨肉相驚涕時復勸加餐因
緣誤煙火塵鞅日以攢上書獻天子索米走長安義和
忽西匿烽燧起樓蘭萬古有綱常肯為興廢寬橫戈希
雪恥屹柱誓迴瀾原妙富貴氣終鮮妻孥歡蕭然世外
味曾無九還丹仙靈重名教忠義固其端所惡精已搖
何以生羽翰神靈倘不減無勞白玉棺

懷古

我懷申大夫哭秦卒復郢人定能勝天一言重九鼎亦有張長史唐室賴藩屏當其語江中籌畫先井井古人秉忠貞謀國無微倖操此左券言勲名終彪炳如何逋播臣智勇不得騁廢興甯有運吾欲訟青冥

其二

雲本依龍翔風亦附虎烈古來王佐才達達待聖哲白水產真人乃能顯高密先主自梟雄隆中願蕩滌卓哉一臣靡赤手挽禹厓澆浞既迭生鄩灌且並滅君方娘有仍臣也奔有鬲國亡四十年興滅復繼絕祀夏伊誰功萬古冠臣節

代內人獄中有寄

國破已飲泣家破復間關自君之出矣妾媵君亦繇兒
女雖有情不在別離間上堂潔脯脰下堂代斑斕知君
驅汗馬豈敢怨紅顏夷官張羅網忠義委草菅奄忽大
椿謝君滯滄海灣兀然生死魂并作鮫珠潛君行寶膚
髮奔跣安所還妾自感百罹飛蓬任雙鬟衰門既零落
空閨誰負艱哀哉并白婦終年困狴犴非不輕微生將
雛實且孱圓扉滋味惡磷青碧血殷古稱東海婦嚴霜
暑路斑胡天嘗夢夢莫辨玦與環如何貫索星獨照望
夫山視彼磨笄峯高名良可攀難將妾巾幗來佐君羽
綸報君還祝君祈常樹人寰

擬答內子獄中之寄

盛年不惜別客久始懷慚我非蓬蒿人江湖遂屢淹况
復避豺虎誰能解征衫孤雁自西來彷彿墜書函書中
寄珍重書外淚重緘恍見閨中秀吞聲寫素練卿今陷
虎穴雙魚何從探珊珊魂魂來關河諒非諳棘林魍魎
卿骨肉各生嫌稚子亦囊頭狼狽形影兼憶我初行役
兵戈未解嚴驅馳悲九折輾轉歲華添白雲空縹緲長
此傷烏銜水鷗雖忘機安得比鷦鷯名教自束躬柔情
非所耽憐卿持門戶鼎俎心已甘豐獄有埋劍紫氣若
烟炎莫邪獨掩抑干將慘不銛神物終應合造化焉能
殲生當挽鹿車死當駕雲驂

吳子佩遠遊雁蕩歸備述名勝因為詩記略亦志

余企望之懷也 戊戌

名山繫慧業遐覽情亦怡恭聞永嘉勝拱揖乃失之吳
子骨森秀獨往良所私白袷破蒼煙短筇橫指麾歸來
氣色驕嵐光生鬚眉磬折前問訊抵掌登眺奇雲根插
萬笏一一攀青霓梯霞轉磴道衆妙來參差靈巖割元
氣陰洞礙朝曦巖中何所有萬象迸歲蕤林立丈人峯
高冠肅威儀危岑古形容箕踞各隨宜洞中何所妙複
道夾軒墀宛轉石竇間髣髴陰風吹居然天地房日月
安敢窺更復捫浮屠寂觀豁天機老僧相候門為告山
靈知飛柯攢石棧叢棘闕天池所以迴雙屐恆懼鬼物
揮但見飲長虹蜿蜒挂翠微時或展湘簾散作千珠璣

聞言殊嘆喑兩腋出寒颼豈無濟勝具而為塵鞅羈拍
手問愚公茲山詎可移

苦饑

登彼三神山慨焉思霞舉蘆荻風蕭蕭白石不可煮絕
粒固所宜躊躇傷徒侶驤首視烏鳶青天嚇腐鼠不念
山中人鉶聲亦疊恥豈乏稻粱謀卑栖因鍛羽安得有
蕨薇療飢待明主

贈別陳文生還三山

平生重意氣定交在班荆忽忽經亂離風雨晦雞鳴得
友炎洲上傾蓋襟已橫一奏蘭蕙曲相辭戒北征青峰
千萬仞家枕古榕城將歸省松菊富為猿鶴驚瓊瑤鮮

雜佩何以贈君行屋梁一片月三山兩處明珍重陳孺子善刀俟漢兵

虜廷以余倡義既久屢復名城遂逮及族屬且開告密之門波累親朋榜掠備至聞之泣然

宗國既飄搖家門遂顛覆感此多難生欲泣不成哭我生實數奇乾坤方百六猘獠滿中華赤靈社已屋孤臣骨可糜豈敢惜孥戮所悲諸父行班白嬰三木女兄與所天株連遭拳梏幸或作流人否恐登鬼錄稚子竟何辜十載尚淹獄仇雠有寡妻墨幃兼縹緲國亡家亦亡我固甘湛族邇聞告密風舊遊復被錄白虹慘欲垂黃金貧莫贖天地豈不寬誰念忠之屬惟應千秋名芬芳

追王蠋破涕慰親朋安知此非福

七言古詩

秦吉了

秦吉了生為漢禽死漢鳥塞南塞北越禽飛悵望故山
令人老載鳴鳴華音載飛飛華土翮折翅垂夷敢我侮
生當為鳳友死不作雁奴我是名禽不可辱莫待燕婉
生胡雛鶯猶嚇鵲休惜倉庚空格磔哀哉不能言起視
嘗歎息

枯魚過河泣

枯魚過河泣道上陽侯揖此方介族難與立

泊馬蹄壑戲成

問馬蹄春風陌上走銅鞮誤被秦皇驅入海玉勒金鞍
不敢嘶龍媒自是波間種何用天閑錦障泥

其二

笑馬蹄骨亦千金志千里追風逐電何處來却與鯨鯢
鬪江水安得飛騰去渥注依然負圖獻天子

壽鮑淵張相國

扶桑之國蓬萊鄉日月所胎生氣長遙與九峯三泖接
神仙窟宅天地房乃有格人降箕宿兵甲胸藏腸篆籀
鳧鷖先從闕下飛鷹冠獨向殿中驟天佑膚公為洗兵
朱旂多鉞仗南征日轂朝扶辰極正星鋌夜掃彗躔平
乾坤有待銅馬帝制閭旌旄橫海濟蚩尤欲殄夢吹塵

胥靡爰登歌作礪丹心洞達八窗開黃髮溫恭萬屢恢
謝棋墅上時時賭狄李蹊遙處處栽先生花甲今復始
考擬中書二十四鼎內和羹手自調焉用金鹽與玉豉
況對仙山咫尺間徐市曾尋大藥還避莽子真丹井在
安期醉墨桃花斑卓哉先生能壽國鼇柱孤擎挽百六
虞淵倒景浴咸池上台含曜融寒谷君不見吾家三戟
世風流杖履從容燕子樓自是綸扉同嗽蔗何須海屋
別添籌又不見漢興正賴子房策封留高蹈求黃石世
間更無却老方不朽功名綿史冊宗風千載先生存轉
軸旋樞裕後昆婆娑彌覺朱顏駐園綺衣冠安足論

鴻門歌

項王怒漢王畏鴻門宴罷鴻溝潰漢人喜楚人恚玉玦
謀空玉斗碎重瞳隆準兩英雄天意有興必有廢成豈
噲也一氣肩敗或亞父疽在背不殺沛公豈云誤此事
却有霸王度當時長者號漢王俎上老翁不相顧既無
父子況君臣三軍縞素為何人

賦贈琴師

入夏園林長新綠小庭疎雨黃梅熟主客雜坐觴數巡
清言弔論驅煩燠座中有客伯牙儔起撫瑤琴弄寒玉
初彈秋意滿瀟湘再彈忽唱陽關曲揮絃換軫轉繁音
往鶴來雲節更促我聞三湘煙景自蒼涼淚痕斑斑猶
在竹得君譜入龍門桐無數離情紛相觸况復驪歌織

指間羈人聽之淚盈掬願君翻作洞越聲莫怨孤鴻與
寡鵠君不見少文動操響衆山又不見中散絕唱廣陵
寒寥寥千載同調難今遇知音為一彈

楊芳生以徐闇公高弟浮海來晤於東甌爰贈一
章

楊生美髯白接羅來自雲間映少微自言年少曾問奇
南州高士則我師南州迢迢不可極且去杖藜看山色
永嘉山水稱妙絕君獨掉頭嗔耳食既擬雁宕構虹橋
復怪龍湫剪蛟綃着履扶筇何太苦丹崖翠嶂枉相招
古人相馬惟相骨今君看山但看笏想君胸中自有五
城十二樓安用詔舞蠻飛之突兀楊生能酒復能棋酒

不分賢聖棋不辨雄雌左手一枰右一危掀髯大噱誇
兵機兵機無過古遁甲君已稍稍知涉獵願君持此覓
封侯男兒豈肯長彈缺君家子雲太糊塗那曉春陵赤
伏符今君不向亭老差勝當年莽大夫

閩南行

閩南自古龍蛇孽犬羊闖入為窟宅元公仗鉞起海東
劍躍蜿蜒弓霹靂一戰築京觀再戰解推結三戰合圍
漳州城萬竈星羅盡樹柵是役也彈丸小醜尚陸梁登
陣不畏河魚疾迴看百雉蚤懸燈照耀閩閩先為赤城
頭刁斗寂不聞惟聞死聲動簞箠我軍鼙鼓聲如雷戰
馬高嘶待橫擊平明兩軍仍相持似惜人命膏鋒鏑

嗟狡虜何其愚奚不肉袒轅門行自絕憶昔秋深胡馬
肥燒荒獵火天成血橐駝九陌換銅駝指顧中原少堅
壁不數年間殺運回漢人復熾胡人滅區區阱獸與釜
魚天戈所指應無敵應無敵多鹵獲或獻俘或獻馘此
時龍戰血爭黃功成誰念溝中瘠兵家奇正鮮常形頓
軍堅城豈善策試籌遁甲探陰符大武何嘗窮天石

苦雨吟

商聲八月何勃窣破雨兼旬復泥滑魚腸寂寞生紫鱗
鷗首依稀長綠髮榜人停撓且卧蓑天公倘或倒銀河
萬里陰霾猶未掃霄漢飛騰柰我何

滄洲行 壬辰

自從錢塘怒濤竭會稽之栖多鍛翮甬東百戶古滄洲
居然天塹高碣石青雀黃龍似列屏蛟螭不敢波間鳴
虎鬣爭如秦婦女魚旆半是漢公卿五六年間風雲變
帝子南迴開宮殿繇來澤國仗樓船烏鬼漁人都不賤
堂怡穴鬪幾經秋胡來飲馬滄海流共言滄海難飛越
况乃北馬非南舟東風偏與胡兒便一夜輕帆落奔電
南軍鼓死將軍禽從此兩軍罷水戰孤城聞警早登陴
萬騎壓城城欲夷礮聲如雷矢如雨城頭甲士早瘡痍
雲梯百道凌霄起四顧援師無螻蟻裒創奮呼外宅兒
誓死痛哭良家子斯時帝子在行間吳淞渡口凱歌還
誰知勝敗無常勢明朝聞已破嚴關又聞巷戰戈旋倒

闔城草草塗肝腦忠臣盡瘞伯夷山義士悉到田橫島
亦有人自重園來向余細說令人哀椒塗玉葉填胥井
甲第珠璫掩劫灰而今人民已非况城郭闕體跳號甯
復肉土花新蝕遺鏃黃石苔蚤鏽缺所緯嗚呼問誰橫
驅鐵柄襦褌令漢土剪龍荒安得一劍掃天狼重斟椒
漿慰國殤

解艇行

乘舴艋載餘艘遶鉦撾鼓走風檣滿船兒卽抹額黃人
言若輩真鷹揚飢則攫人飽則颺江村雞犬絕鳴吠老
樵吞聲泣道旁罄我餅中粟使我朝無糧斷我機中絲
使我暮無裳我亦遺民事耕織當身不幸見滄桑入海

畏蛟龍登山多虎狼官軍信威武何不恢城邑願輸夏
稅貢秋糧

寄紀石青乙未

憶昔公車歲在午太乙飛精挂河鼓閩南紀生豈其傳
搏風遂奪吳剛斧余亦持鋒起越中謬於文章稱跋扈
乾坤排蕩會有人日月沈淪忽無主言也左袒一奮呼
五千甲盾色如土斯時屬睭望漢官君獨躬耕吟梁父
終繻不棄意何深賈組長擢節苦迨余收燼亦望山錫
潤銅乾抑何補低眉始作下邳遊屈指誰向中宵舞短
衣皂帽乍相逢濁酒素簪安足數予理能令萬象開鴻
文直並三墳吐別來國步尚滄桑藉甚襟期在幹蠱聞

君曳履近夔龍笑余衮衣逐罷虎寂寂溫劉竟屬誰悠
悠絳灌徒為伍甌越兮雲自卷舒勾吳落月空分割何
時功成歸去來重與尊前說破虜

歲在戊戌余行年已三十九矣撫時感事遂以名
篇

人生百歲安得有我今草草三十九猶憶中原蕩赤風
結束辭家歲在酉銀魚嘗挂鐵柄襦金馬長懸玉七首
江東霸氣倏蕭條純鈎繡澀沈槍朽縱橫露布浪飛書
突兀星槎莽犯斗風雲縮胸帝應嗔日月膏盲鬼亦吼
丈夫意氣豈勲名何況文章等芻狗頭顱如許可奈何
慷慨悲歌還自詒太史公牛馬走鯨涎蛟沫日攢眉虎

符龍節憑誰手擲揄齷齪里中兒纍纍黃金竊佩肘帶
礪山河安在哉五侯空館龜文紐自昔英雄多妙年隆
中圯上相先後如彼南陽鄧仲華丹青獨畫雲臺石其
人鬚眉尚宛然咄咄微軀真敝帚古來何代無廢興雌
伏雄飛更某某上不為富春澤畔羊裘翁下即為山中
宰相天子友不見故侯原上瓜請看徵士門前柳誰能
出處兩無憑躑躑十里笑雞口莫論兵且飲酒今人爭
羨古人賢後人亦羨今人古

長鯨行

南海長鯨何橫絕吞吐波濤噴日月鼓鬣俄成赤羽旗
批鱗都變黃金穴初依海市現樓臺旋上天關守宮闕

天狼忽從西北來，旌為蚩尤鞭。為亭長鯨稽首稱波臣，
玉皇香案皆羶羯。希恩豈望鳳凰池，論功欲乞蛟螭窟。
那識狼心最不仁，組繫長鯨離溟渤。跳梁竄復昔睚眦，
涸轍應憐舊饕餮。長鯨有子類龍種，起伐靈鼉震列缺。
銀河朝犯織女機，珠浦夜泣蛟人血。天狼跋扈還叱咤，
僉謂鯨鯢本遺孽。疏屬山頭貳負屍，鐘離村內嵒車骨。
殘魂幾處聽蒲牢，遺醢何年化彭越。嗟嗟長鯨爾何愚，
如彼異類空屈節。神龍不臣臣貪狼，扶目屠腸坐自滅。
昨夜星躔孤矢明，却喜橈檣影欲沒。天狼天狼莫漫驕，
海宇會有真龍出。

辛丑秋虜遷閩浙沿海居民壬寅春余曠棹海濱

春燕來巢於舟有感而作

去年新燕至新巢在大厦今年舊燕來舊壘多敗瓦燕
語問主人呢喃淚盈把畫梁不可望畫艦聊相傍蕭羽
恨依樓樹泥嘆飄蕩自言昨辭秋社歸比來春社添惡
况一片蘼蕪兵燹紅朱門那得安無恙最憐尋常百姓
家荒烟總似烏衣巷君不見晉室中葉亂五胡烟火蕭
條千里孤春燕巢林木空山啼鷓鴣只今胡馬仍南牧
江村古樹竄鼯鼯萬戶千門徒四壁燕來亦隨檣上烏
海翁顧燕且太息風簾雨幙胡為乎

奇零草一

奇零草二目次

張忠烈公集卷五

五言律詩

暑夜獨坐

絕炊

僕還

贈駱亦至

壬辰

其二

登湄洲

送萬美功還越時其弟靜齋將赴行在

鬢有絲

甲午

追慕

其二

得友人書道內子艱難狀

其二

客有談故園花事者感而賦此

秋懷乙未

其二

其三

大安沙坐風雨復疊前韻

其二

其三

沙關感懷

得姚興公書以舫音集見寄

其二

生還

其二

其三

其四

島居

其二

其三

其四

其五

其六

其七

其八

送邱含山還長亭山房 己亥

浮蹤同含山感賦

寒山 庚子

庖焚

得朱子成書

聞監國魯王以盜警奔金門所

秋夜舟中聽雨

新河口雨泊

其二

送吳佩遠職方南訪行在兼會師鄖陽辛丑

其二

其三

其四

感事

其二

其三

其四

秋日傳蜀郡克復瓊海反正喜而有賦

弔旅墓

三過沙關

送羅子木往臺灣

其二

長至舟次祝聖

其二

元夕金鄉道中 壬寅

其二

春心

重陽偶成

甌行志慨

其二

其三

舟行立冬

朱君伯遷將避地小溪來索詩余無暇為也口占授之

北回示將吏

顯甥奔至

聞家難有慟

其二

其三

其四

贈陳文生侍御返命閩嶠

其二

五言排律

閏元宵十四韻 己亥

奇零草二目次

奇零草二

張忠烈公集卷五

皇朝賜諡忠烈明贊理恢勦機務察視浙直水陸兵馬兼理糧餉兵部尚書兼東閣大學士鄧張煌言撰

五言律詩

暑夜獨坐

炎熇如酷吏入夜氣猶蒸
晞髮涼初透撫鬚興欲乘
風斜穿密牖月午漏疎藤
四壁蟲聲咽誰堪一語冰

絕炊

炎涼雖世態不信在同舟
自是梁間燕真如水上鷗
婢原無赤腳僕已鮮蒼頭
亭午炊烟絕何能免百憂

僕還

僕貞良不易旅瑣更為難
已任辭耕去還同戀棧看
敝

惟原有待墮履未應拚自是無銀鹿猶勝形影單

贈駱亦至壬辰

客自涪州至蕭然野鶴姿青雲猶冉冉白雪故離離
混俗原無我廉頑更有誰蒲輪指日下莫漫采江蘼

其二

唐室當中葉君家有右丞雄文堪討賊苦節亦為僧
蹤跡今相似遭逢古未曾會須扶日月滄海見鯨升

登涓洲

不盡滄浪興孤舟眺晚暉海翁稱地主野父說天妃
昨舡風前出鑿鋤雨後歸休憐雖未解一笑亦忘機

送萬美功還越時其弟靜齋將赴行在

令弟將南邁元方又北征
炎荒萬里節越絕一歸旌
欲聚非麋鹿難分是鵲鴒
祇應山鬼語但見送人行

鬢有絲甲午

曉起窺雙鬢衰容變二毛
鬚眉長自照筋骨總徒勞
物態離情換年華苦節銷
自憐蒲柳質秋意早蕭條

追慕

國難驅人出家傾待子歸
可能磨墨盾其奈冷斑衣
金革三年淚冰霜寸草暉
髮膚雖不毀猶恨故園非

其二

廿載嗟何怙長衡杯棬愁
節旄看盡落斧鬣悔遲謀
燕去巢應改烏號屋僅留
在堂有妾蛻無計剪松楸

得友人書道內子艱難狀

尺牘胡然至寒溫不自通殷勤報聞外辛苦歎閨中
釜原兼絕機投亦屢空鹿車誰共挽羞殺是梁鴻

其二

家計深行惻朱顏亦固窮漸來應化石遮莫但飛蓬寄
託城交道支持仗女工可憐織箔手未得到從戎

客有談故園花事者感而賦此

故國春應滿花枝解照人
欲筌還出郭燒笋或呼隣此
事真無價吾行未有津繁華豈不愛天步屬艱辛

秋懷乙未

秋色來何許滄江對晚潮
宜人偏淡蕩似我總蕭條隼

翻憑誰健狼心尚爾驕也知雲意薄聊自擬丹青

其二

屈指金行半流光不我予鱸膾味信美雁足耗金疎客
散黃金盡兵飢白絮虛只愁綿力弱何以挽皇輿

其三

天方尊肅氣民已苦兵聲高枕真無事扁舟似有情靜
同仁者壽隘得聖人清遣放應如此毋勞造物爭

大安沙坐風雨復疊前韻

風雨添新漲荒洲幾尺湖場禾愁滯穗渚荻響叢條茅
舍炊烟淡蓬窗暝色驕秋飈毋乃妬未敢說摩霄

其二

不解因人熱新涼忽起予單衫輕自好雙鬢落應疎冷
暖秋中節升沈覺復虛九州多怪事無賴問堪與

其三

尋常悲旅況可複雜秋聲砧杵千家夢萼萼八月情寒
蛩啼露重健鶻喜霜清始識乘除理予心了不爭

沙關感懷

飄泊曾何濟蕭然一撫襟呼童酬白髮結客煉黃金擊
水垂天翅依風縮地心得閒聊把卷非敢學書淫
得姚興公書以舫音集見寄

何處纖鱗至瓊雲落滿函虎溪聞卓錫鷺島憶歸帆詩
律隨人老禪鋒已不凡慚余塵夢在兀兀趁征衫

其二

救世嗟無具為僧亦自嘉
只愁新舊雨總作暮朝霞
楓落江烟淡梅黃溪月斜
何時雙鳥下相對飯胡麻

生還

落魄鬚眉在招魂部曲稀
生還非衆望死戰有誰歸
蹈險身謀拙包羞心事違
江東父老見一一問重圍

其二

痛定悲疇昔江皋滿陣雲
飛熊先失律騎虎竟孤軍
國莽焚舟計虺隤汗馬勲
至今頻扼腕野哭不堪聞

其三

本以揚旌去胡為棄甲旋
名城空嘯錯故老盡株連
百

折終何補千秋尚復憐亦知收燼易蕭索姚金錢

其四

奔北誰能殿圖南我亦迷翻今百步笑未得一枝栖孤
島搖烽燧登壇恃鼓輦風雲蹉跌後無計展霜蹄

島居

天地勞何甚空山足息機
夕黃悲鼎沸蒼莽看帆飛
誤世芙蓉劍撩人薜荔衣
迷途知未遠還復卧鳬磯

其二

島事幾滄桑何勞更辨亡
人能扶日穀我且挾雲囊
傲骨甘鷗鷺雄心怯虎狼
諫茅還闢土海外有封疆

其三

古賢多大隱，豈必盡攀龍。所惜辜三輔，其如礙兩雄。計疎憑鑄錯，道廢漫書空。仰止羊裘客，千秋一冥鴻。

其四

山中仍逐鹿，却喜少雄雌。蛋戶供新錯，蜃樓獻秘嬉。鑿坏聊偃蹇，拜石故支離。試問門前雀，何如翟尉時。

其五

閭闔不可極，投荒小有天。行藏疑橘叟，變化媿梅仙。野火漁燈外，樵風雁字前。到來生百感，歎息理詩篇。

其六

浮槎非我好，戀戀為衣冠。豫讓橋應近，田橫島正寬。蘆中長磬折，圯上獨盤桓。雖未成嘉遯，人呼管幼安。

其七

十洲曾卜築師過毀為薪荆棘任公宅蓬蒿夸父津老
麀避客去舊犬逐人親不忍乖初服茆檐日又新

其八

鳩工嚴部勒治屋亦猶兵據水軒轅法依山壁壘橫短
垣繚却月中雷冠長庚只此扶桑國居然細柳營

送邱含山還長亭山房己亥

投老猶垂橐忘歸未拂衣江山雙淚迸家國寸心違作
客悲王粲為郎憶紫薇入林還悵望吾道已全非

浮蹤同舍山感賦

蕭瑟干戈事浮踪已似萍半牀留破席一室久疎檣霜

月窺人白漁燈入夜青天涯知己在猶自歎零丁

寒山庚子

寒山一息影歧路總忘機敢望充藜藿其如斷蕨薇徘徊貪有髮惆悵賦無衣此地兼烽火孤踪何所依

庖焚

已自傷餘燼何堪厨傳災早應防厝火空復冀燃灰鼎俎渾輕擲盤盂且盡墮明朝添菜色那得爨烟開

得朱子成書

書來惜分手正憶曉城秋入海仍精衛還山尚蒯緱參差非恨事倉卒少良謀異日傳心史孤忠冀見收

聞監國魯王以盜警奔金門所

揮淚東南信初聞羣盜狂扁舟哀望帝區馬類庫王流
氣終何恨依斟倘不妨只今謀稅駕大地已滄桑

秋夜舟中聽雨

不盡蕭蕭意還從入夜生草枯沙磧氣木落洞庭聲
敲枕聞疎密敲蓬辨濁清渾疑刁斗靜鐵騎暗縱橫

新河口雨泊

一水真衣帶今行報幾籤迴颺何震盪飛沫更廉纖
嶺潮聲壯膠舟風勢嚴叢祠堪蔽雨分旅向山尖

其二

四時冬不用況乃問舟程自與涸人伍翻令颺母輕
枯槎粘水骨虛枕挂魚睛珍重陽侯意毋勞費送迎

送吳佩遠職方南訪行在兼會師鄭陽 辛丑

何處申胥淚，星槎滄海回。依墻悲鶴立，戀闕夢鑾迴。黑
纛黃圖闢，烏蠻紫氣來。孤臣芒屨好，敢望畫雲臺。

其二

哀牢原有國，聞自夜郎移。輦路應千折，旌臺亦九疑。駿
歸何日事，翟捧幾人知。君去排閭闔，將無恨執羈。

其三

鄭江稱斗絕，咫尺向夔門。雲棧凌霄起，霓旌插壁屯。金
貂皆上將，鐵馬足中原。一見隨何檄，還應報國恩。

其四

尚有臣靡在其如，天步何涼州。方倚柱盟府，孰揮戈刀。

斗孤軍細香盆夾道多憑君馳蠟表蚤晚聽鏡歌

感事

箕子明夷後還從徽外居端然殊末恪終莫挽殷墟青
海浮天闊黃山裂地虛豈應千載下摹擬到扶餘

其二

聞說扶桑國依稀弱水東人皆傳燕語地亦聞蠶叢筆
路曾無異桃源恐不同鯨波萬里外倘是大王風

其三

田橫嘗避漢徐福亦逃秦試問三千女何如五百人槎
歸應有恨劍在豈無嗔慚愧荆蠻長空文採藥身

其四

古曾稱白狄今乃紀紅夷
蠻觸誰相鬪雌雄未可知
鳩居粗得計蜃市轉生疑
獨惜炎洲路春來斷子規

秋日傳蜀郡克復瓊海反正喜而有賦

商聲八月愁萬木正凋秋
空谷音初到同袍賦足酬
珠崖仍復漢玉壘亦宗周
從此投天隙羣雄好兆謀

弔旅墓

荒墳三尺土宿草幾經秋
鬼亦離鄉賤人胡渡海游
鹿場殘照淡蟻垤野花幽
不用山陽笛淒然淚自流

三過沙關

五載真如夢秦川恨舊游
地分山閩越天闊水沈浮
鴻鵠難羈繼蛟龍空負舟
包胥洵國士復郢更辭侯

送羅子木往臺灣

中原方逐鹿何暇問虹梁欲攬南溟勝聊隨北雁翔
臺帆天外落蝦島水中央應笑清河客輸君是望洋

其二

羽書經歲杳猶說袞衣東此莫非王土胡為用遠攻
圍師原將略墨守亦夷風別有芻蕘見迴戈定天戎

長至舟次祝聖

朔氣行將盡今來復一陽書雲存珥筆挽日仗冠裳
社稷千帆影乾坤一劍芒微臣無限恨稽首儼天王

其二

歲華方剝極何意泰重來國脈真如線天心未似灰
山

呼愁節禿海晏待槎迴賴有黃鍾動梅花雪自開

元夕金鄉道中壬寅

海苦波俱惡春陰氣倍寒征帆渾出沒窺鏡儘闌珊燈
謎憑誰賭棋聲讓客彈勞生兼浪跡節物肯為歡

其二

最是蹉跎恨都從此夕來幾年春爛漫共月影徘徊每
擬銀鈎滿當看玉燭開逢時還寂寂辜負夜光杯

春心

滄江歲月深老去惜春心花到辛夷候人歸杜宇音聞
眠避獨醒繁恨寄孤吟天骨原蕭散能消許事侵
重陽偶成

九日素秋晴霜容淡倍明香孤知菊傲寒偏覺衣輕蕭瑟茱萸佩躊躇鴻雁聲不愁吹落帽華髮故多情

甌行志慨

甌水秋堪掬頻來五雨輕豈知魏勝壘欲化李陵城苦口吾同澤甘心彼喪名張陳千古恨誰更負今盟

其二

不信炎靈斷還留七尺身吹笳悲自壯擊筑和誰親故主呼迎苦遺民泣避秦所愁惟甲脫徒倚欲沾巾

其三

行矣河梁別翻為送隴西胡天應誤雁漢地孰亡歟冰雪危孤膽風雲怯病蹄玉關雖咫尺敢復望芝泥

舟行立冬

寒暄原物候忽忽已揚舲歲月偏如鵲乾坤總似萍江
聲浮碧落爽氣混兮冥笑問銀河上曾無犯客星

朱君伯遷將避地小溪來索詩余無暇為也口占
授之

賀監抽簪去君恩賜鑑湖至今高尚宅猶在四明墟此
地能真隱斯人亦不孤所愁溪鳥笑閒殺輞川圖

北回示將吏

利鈍甯能料孤軍又北回同仇計在矣遺老思深哉破
釜烝徒義持籌奉佐才古來忠孝事天地每相哀

顯錫奔至

初聞購孺子何幸脫蘆中執手哀吾姊囊頭並若翁死
生盡一別忠孝已雙窮淒絕青山外鵲啼血倍紅

聞家難有慟

仇國言終驗門衰祚亦危痛深惟骨肉毫及受參夷白
首青楓暗黃腸廣柳遲百端交集處能不碎心脾

其二

家破原因我何堪玉並焚亢宗空有子函夏已無君左
衽興亡決南冠生死分拊棺猶未得揮淚結予雲

其三

孤竹行吟後家無四壁存更聞宗欲墜不但族先燔躡
蹠微臣節踉蹌孝子魂願為雙白鶴飛去叩天關

其四

淫威何太甚原外鵲鴒鳴空擬班昭疏甘成聶政名肝
埋有處士腸斷是零丁遙識胥江路霜飛獨滿城

贈陳文生侍御返命閩嶠

益部今何似孤懸一使星滿思匡漢室虛擬乞秦庭鶴
立孤臣淚龍潛舊主靈倡予還和汝天夢儻然醒

其二

恨別還如昔憂危較獨多孤槎偏跼躅故節已蹉跎羽
翼猶吾否鬚眉柰爾何南陽雄雉在努力向滹沱

五言排律

閩元宵十四韻 己亥

獻歲杓頻指良宵箭獨稠東皇澤玉厯南陌駐銀鈎
葉應雙吐椒花已兩浮小年燈市永午夜漏聲悠月令
初中節風光第幾籌蟾輝看倍皎鶯語聽全流復擬傳
柑會偏宜秉燭遊流黃連夕怨拾翠隔旬愁柳弱先披
拂梅寒故逗遛乾坤分正閏夷夏辨春秋只此尊天統
因之念帝憂耗磨何足論伏臘豈相謀金鑰方重闢銀
缸可再篝香塵冉冉去歌吹幾時休

奇零草二